

DEN AMBIENTE

Entrevista exclusivo cu Miss Aruba 1995/96, Tarin Mansell for di Medellin, Colombia.

"MI TA HOPI CONTENTO DI A TUMA E DESICION PA PREPARA MI MES NA COLOMBIA"...

**** DEN AMBIENTE** a tuma contacto telefonicamente cu nos Miss Aruba, Tarin Mansell, kende actualmente ta na Medellin, Colombia.

Manera ya ta conoci cu recientemente nos representante pa e certamen di Miss Universe 1996 a viaha pa dicho pais, na unda e ta bao di guia di e conocido maestro diseñador Jaime Arango, kende ta preparando Tarin Mansell cu un programa sumamente extensivo y profesional, pa asina nos Miss Aruba brinda nos dushi isla turistico un digno representación durante e magno certamen di Miss Universe 1996.

Na momento cu **DEN AMBIENTE** a yama na cas di Jaime Arango, na unda Tarin Mansell ta hospeda, nos a encontra cu ruman di Jaime Arango na telefoon, kende a duna nos di conoce cu Tarin Mansell ya caba a bay drumi, debi cu e ta hopi cansa. Na momento cu **DEN AMBIENTE** a notifica su mes y alaves a puntra pa Jaime Arango, Tarin Mansell a ser lanta for di soño y cu mucho gusto el a sostene **DEN AMBIENTE** un entrevista breve.

Esaki naturalmente **DEN AMBIENTE** a aprecia masha hopi mes di parti di



Tarin Mansell, kende a demostra cabalmente cu maske con cansa su curpata, tog e tin cu cumpli cu su trabao di informa su pueblo natal tocante su preparacionnan.

Despues di un cordial saludo, nos maxima belleza a cuminsa ta relata: "Manera bo sa cu mi a tuma e desicion pa bin Colombia pa asina cuminsa prepara mi mes. Actualmente mi ta sinti mi hopi contento cu mi a tuma e desicion ey, ya cu mi ta sintimi mihor prepara aworaki. Mi ta hopi contento akinan, ya cu mi a logra un progreso bastante grandi den desaroyo intelectual".

Tarin Mansell ta sigui conta: "Mi ta asistiendo actualmente na varios cursonan manera; pasarela, maquillaje y periodismo di palabra.

Loke mi por a saca for di e cursonan aki, mi ta hopi contento, nos Miss Aruba sumamente satisfecho ta expresa na **DEN AMBIENTE**.

Tambe Tarin ta conta cu tur mainta tempran e ta asisti na un sesion di gimnasia cu ta dura un hora, despues e ta asisti na lesnan di periodismo cu tambe ta un hora, despues e ta continua cu un otro sesion na

gimnasia pasivo, despues mei hora di les di caminata y maquillaje cual ultimo constantemente e tin cu ensaya.

Tarin Mansell ya tin tres siman caba ta siguiendo e programa extensivo aki, cual lo finalisa otro siman. Nos Miss Aruba ta ser spera bek na Aruba pa otro siman.

Dia 13 di April prensa di Aruba y tambe invitadonan, por bay aprecia Tarin Mansell su trahenan cu e lo bay representa Aruba, durante un anochi di gala.

Mientras tanto dia 26 di

April nos Miss Aruba tin cu viaha pa e famoso ciudad di Las Vegas, na unda e certamen di Miss Universe 1996 lo bay tuma lugar dia 17 di Mei.

Awe merdia entre 12or pa 2or durante e programa di **DEN AMBIENTE** na Radio Galactica, por scucha e entrevista aki y tambe e propio diseñador Jaime Arango ta declara cu e ta preparando Miss Aruba exclusivamente pa e certamen di Miss Universe 1996 na Las Vegas, U.S.A...



**** Ayera a drenta den enlace matrimonial e feliz pareha Odalis Dominquez y e conocido comerciante Rudy Croes di Lee Tai Trading, kendenan ta patronicador di nos Miss Aruba, Tarin Mansell. DEN AMBIENTE ta desea e feliz pareha aki un eterno luna di miel....**